

**SPR umum tarikh p'raya kecil DUN Tenang 24 Dis**  
**Malaysiakini.com**  
**Disember 20, 2010**

Suruhanjaya Pilihan Raya (SPR) akan mengumumkan tarikh penamaan calon dan hari pengundian bagi pilihan raya kecil Dewan Undangan Negeri (DUN) Tenang, Johor, Jumaat ini.

Setiausaha SPR, Datuk Kamaruddin Mohamed Baria berkata pihaknya telah menerima notis berhubung kekosongan kerusi DUN itu selepas dimaklumkan oleh Speaker DUN Johor pada 17 Disember lepas.

"SPR akan mengadakan mesyuarat khas untuk membincangkan semua perkara berkaitan pilihan raya kecil DUN Tenang pada 24 Dis di ibu pejabat SPR di Putrajaya," katanya dalam satu kenyataan hari ini.

Kerusi DUN Tenang dalam kawasan Parlimen Labis, kosong berikutan kematian penyandangannya, Datuk Sulaiman Taha pada 17 Disember lepas.

Sulaiman, 59, disahkan meninggal dunia akibat jangkitan kuman dalam darah dan penyakit kencing manis di Hospital Pakar Ampang Puteri, Kuala Lumpur pada pukul 1.10 pagi.

Sulaiman mempertahankan kerusi DUN Tenang pada pilihan raya umum ke-12 dengan menewaskan calon PAS, Mohd Saim Siran dengan majoriti 2,492 undi.

- Bernama

Copyright © 1999-2007 Mkini Dotcom Sdn. Bhd.  
Source : <http://www.malaysiakini.com/news/151257>